
СВЕТАФОРЛАРДА ЯНГИ ЭЛЕКТРОН ҚУРИЛМА

Бугун кўчаларимиз тобора чирой очиб, равонлашиб, номига мос ва ўзига хос кўринишга эга бўлаётир. Автомашиналар қатнови қулай бўлиши учун йўллар янада кенгайтирилиб, соз ҳолга келтирилди.

Чорраҳаларга янги замонавий светафорлар ўрнатилди. Аҳолининг хавфсизлигини таъминлаш, умумий фойдаланишдаги автомобиль йўлларида ҳаракатланиш тизимини тартибга солишда яратилган қулайликларни кўриб, кўз қувнайди.

Аммо айрим ҳолатда электр энергиясининг узилиб қолиши натижасида светафорларнинг ишламаслиги йўлларда тирбандлик ҳосил бўлишига олиб келарди. Қизил чироқнинг яшилга, яшилнинг сариқ чироққа ҳеч бир огоҳлантиришсиз ўтиб кетиши ҳайдовчиларга ноқулайлик туғдирарди. Бундай камчиликларни бартарф қилиш мақсадида Фарғона политехника институтининг бир гуруҳ олимлари янги лойиҳа ишлаб чиқдилар. “Ер усти транспорти тизимлари ва уларнинг эксплуатацияси” кафедраси мудир Маҳмуджон Турдиев, катта илмий ходимлар – У.Рустамов, А.Тожибоевлар ҳамкорлигида яратилган светафор тизимини узулуксиз электр энергия билан таъминлаб турувчи электрон қурилманинг амалиётга жорий этилиши соҳада янгилик бўлди.

Қурилма электрон комплекс аккумулятор ва электр қутисидан ташкил топган, – дейди институт профессори Сирожиддин Эргашев. – Электр токи паст кучланишда бўлганда ёки узилиб қолганда доимий ўзида йиғиб турган энергия билан таъминлайди.

Дастлаб қурилма вилоят ички ишлар бошқармаси ҳамкорлигида Ватанпарвар кўчаси чорраҳасидаги светафорга қўйилиб, синовдан ўтказилди. Ҳеч қандай камчиликлар аниқланмагач, Аҳмад Фарғоний, Аэропорт, Мустақиллик, Баҳор кўчалари чорраҳасидаги светафорларга қўйилиши белгиланди.

Қурилманинг ишлаб чиқиши йўл ҳаракати ҳафсизлигини таъминлашда муҳим аҳамиятга эга, – дейди вилоят ИИБ ЙҲХБ ҳузуридаги ихтисослаштирилган ўрнатиш ва фойдаланиш бўлими бошлиғи Дилмурод Мамазиев. – Жараёни назорат қилиш мақсадида ишчи гуруҳ тузилди. Шаҳар кўчалари ҳамда туман автомашина йўлларидаги чорраҳаларга ўрнатилган светафорларни электр тармоқларидан узилишлар вақтида энергия билан таъминлаш бўйича бажарилган ишлар юзасидан кунлик ҳисобот топшириляпти. Йил якунига қадар ишлаб чиқилган жадвал асосида вилоятимизнинг шаҳар, туманларидаги 214 та чорраҳаларидаги светафорлар қурилма билан таъминланиши режалаштирилган.

2017-05-11 15:44:19